

## VEDTEKTER FOR FAGSKULEN I SOGN OG FJORDANE

### **§ 1 Formål**

Fagskulen i Sogn og Fjordane skal gjennom eit robust og utviklingsretta fagmiljø tilby fagskuleutdanning med ein høg fagleg og pedagogisk kvalitet og som er tilpassa behova i marknaden. Utdanninga skal vere eit reelt tilbod for heile fylket, prega av fleksibilitet i organisering og gjennomføring.

Fagskulen skal gjennom partnerskap med offentlege instansar, bransjar, bransjeorganisasjonar og næringsverksemdar vere eitt av fleire verkemiddel fylkeskommunen nyttar som regional utviklingsaktør.

### **§ 2 Styret – val og samansetnad**

#### *Organisering*

Fagskuleutdanninga i fylket skal ha eit styre som er oppretta med heimel i kommunelova § 11-1 og i lov om fagskuleutdanning § 3 fjerde avsnitt. Styret er det øvste styringsorganet for fagskuleutdanninga. Fylkestinget er det øvste politiske organet for fagskuleutdanninga.

#### *Valperiode*

Valperioden for styret følgjer den fylkeskommunale valperioden.

Studentrepresentanten vert vald for eitt år om gongen.

#### *Samansetnad*

Styret har 7 medlemer med personlege varamedlemer, og skal vere samansett slik:

- to medlemer frå næringslivet
- to politiske medlemer frå fylkeskommunen (1 frå hovudutval for opplæring og ein frå hovudutval for plan og næring)
- ein medlem frå administrasjonen i fylkeskommunen
- ein medlem etter framlegg frå dei tilsette ved fagskuleutdanninga
- ein medlem etter framlegg frå studentane

Fylkesutvalet har valretten og vel medlemene frå næringslivet etter forslag frå deira organisasjonar.

Fylkesutvalet vel leiar og nestleiar.

### **§ 3 Styret – oppgåver og mynde**

Styret har følgjande hovudoppgåver:

- Ha det overordna ansvaret for planlegging og oppfølging av fagskulen si verksemd.
- Vere ansvarleg for at studia blir gjennomførde etter vedtekne planar.
- Søkje om godkjenning av fagskuleutdanninga.
- Vere ansvarleg for at all informasjon som vert gjeve til NOKUT og til søkjarane er korrekt og fullstendig.
- Ha ansvaret for kvalitetssikringa av utdanninga.
- Ha ansvaret for at verksemda er av høg kvalitet og at skulen vert driven effektivt og i samsvar med gjeldande lover og forskrifter.
- Leggje strategiar og planar for den faglege verksemda ved skulen, i samsvar med rammer og mål gjevne av fylkestinget.
- Ha ansvaret for at dei økonomiske rammene og eigedom vert disponerte i samsvar med gjeldande regelverk.
- Leggje fram årsrekneskap med resultatata av verksemda og framlegg til budsjett for komande år.
- Leggje til rette for oppretting av studentråd og samarbeide med studentrådet om læringsmiljøet.

Styret vedtek følgjande:

- Det faglege tilbodet
- Framlegg til budsjett
- Plan for intern organisering
- Studieplan og årsplan, inkludert plan for etter- og vidareutdanning for tilsette
- Reglement for fagskuleutdanninga, jf. lov om fagskuleutdanning § 6
- Anna verksemd, inkludert kurs
- Tilsetjing av fagleg og administrativ leiar for fagskuleutdanninga
- Tilsetjing av andre arbeidstakarar.
- Delegering av mynde til fagleg og administrativ leiar og ev. til andre.

### **§ 4 Styremøta mv.**

For styremøta gjeld følgjande:

- Styret gjer vedtak i møtet.
- Styret vert innkalla av styreleiar eller når minst to styremedlemer krev det.
- Styret kan gjere vedtak når minst 4 medlemer, inklusive styreleiar eller nestleiar, er til stades.
- Styret sitt vedtak vert gjort med alminneleg fleirtal. Ved røystelikskep gjeld det som styreleiar har røysta for.
- Det skal førast møtebok frå styremøta. Møteboka skal underskrivast av alle styremedlemene.

### Godtgjersle til styret

Styremedlemene er omfatta av *Reglement for folkevalde sine økonomiske vilkår* og får møtegodtgjersle etter gruppe 2 i reglementet.

Styreleiaren får fast godtgjersle etter pkt 1.3 i reglementet.

### **§ 5 Administrativ og fagleg leiing**

Fagskulen skal ha ein rektor som øvste administrative og faglege leiar, jf. lov om fagskuleutdanning §3, 3. ledd.

Rektor er sekretær for styret og har møte- og talerett i styret.

### **§ 6 Klagebehandling**

Styret har ansvar for sjølv å behandle klager eller for å nemne opp ei særskild klagenemnd, jf. lov om fagskuleutdanning § 7. Styret har ansvar for å avgjere samansettinga og kompetansen til ei eventuell klagenemnd og reglar for klagebehandling.

### **§ 7 Læringsmiljø**

Styret har det overordna ansvaret for det fysiske og psykiske arbeids- og læringsmiljøet til studentane, jf. lov om fagskuleutdanning § 4 a.

Styret skal, i samråd med eventuelle studentorgan, leggje tilhøva til rette for eit godt læringsmiljø og arbeide for god studentvelferd.

Som del av skulen si kvalitetssikring skal det utarbeidast eit dokumenterbart system for ivaretaking av læringsmiljøet.

### **§ 8 Studieplanar**

Styret har det overordna ansvaret for studieplanane. Styret har ansvaret for at studieplanane er i samsvar med godkjenninga frå NOKUT. Styret er ansvarleg for at gjennomføringa av utdanningane er i samsvar med studieplanane. Studieplanane skal reviderast kvart år og godkjennast av styret ved starten av kvart studieår.

### **§ 9 Grader og yrkesutdanningar - titlar**

Fullført toårig utdanning ved ein fagskule gir rett til å nytte tittelen *fagteknikar*.

Departementet vil ev gje forskrift om krav til andre titlar/grader.